

四庫全書

子部

欽定四庫全書

子部

藝林彙考飲食篇卷一

四

詳校官中書王鵬

員外郎牛檢文覆勘

總校官編修王燕緒

校對官中書王鍾泰

謄錄監生崔鶴立

欽定四庫全書

藝林彙考飲食篇卷一

蓬萊縣知縣沈自南撰

饗膳類

雋言杜周

應作

傳親二宮之饗膳

今按周禮鄭註膳牲肉也

師古曰

熟食曰饗

賈公彥周禮疏云饗和也熟食須調和故號曰饗

具食曰膳膳之言

善也

丹鉛錄周禮注小禮曰飧大禮曰饗

今按此鄭氏秋官司儀注文饗下尚

有饌字賈公彥疏云小禮曰飧者聘禮使宰夫設飧禮物又少故曰小云大禮曰饗饌者以其有牲有牽芻薪米禾又多故曰大○儀禮聘禮註云牲殺曰饗生曰饌又曰飧客始至之禮饗既

將幣之禮

此鄭氏春官外饗註文

今之通訓曰朝饗夕飧

此本趙岐孟子

註

飧如今驛舍下馬飯饗如今下馬宴客至必夕夕食

未盛故曰夕飧享宴必以早為敬而享宴必盛故曰朝饗然飧字從夕食今作殮訛矣

余氏辨林饗飧注云朝饗夕飧及考通俗文水澆飯曰飧則是古人夜亦食粥也

詩名物疏說文云食一米也从皂

皮反及

人

音集

聲周書云

黃帝始蒸穀為飯烹穀為粥周禮膳夫王食用六穀食
醫掌和王之六食禮記云食養陰氣也又云食齊視春
時羹齊視夏時醬齊視秋時飲齊視冬時釋名云食殖
也所以自生殖也古史考云神農時人方食穀加米於燒
石之上而食之黃帝時始有釜甑火食之道成矣

詩名物疏說文饔酒食也或从𠩺

音夷

或从米周禮饔

饔人掌凡祭祀共盛儀禮主婦視饔饔饔于西堂下注云

炊黍稷曰饘

詩名物疏傳云熟食曰殮箋云殮讀如魚殮之殮說文殮舖也從夕食字林云水澆飯也韻會注云人旦則食飯夕則食殮殮為飯別名釋名云殮散也投水於中解散也

按鄭志答張逸書云禮殮饗太多非可素故易傳然說文有云水澆飯左傳僖負羈饋盤殮趙衰以壺殮從餒而不食亦未始非孰食也不知鄭何見定以孰食為牢

禮之飧乎

詩名物疏釋詁云饁饋也孫炎云饁野之饋也

詩名物疏傳云粢餐也諸侯入為天子卿士食采祿周禮疏云載師家邑任稍地則大夫之采也小都任縣地則六卿之采也大都任疆地則三公之采也古者祿皆月別給之若今月奉爾雅云粢餐郭璞曰今河北人呼食為粢朱傳或曰粢粟之精鑿者

示兒編生民詩曰釋之叟叟烝之浮浮毛曰釋浙米也

孔曰浙米謂洮米也叟叟聲也浮浮氣也又曰釋訓云
漚漚浙也煇煇氣也樊光遠引此詩孫炎曰漚漚浙米
聲煇煇炊之氣傳以洮米則有聲炊飯則有氣取爾雅
之意為說也浙星歷反漚蘇刀反煇音浮孟子曰接浙
而行趙曰浙漬米也不及炊浙先歷反考是二說皆讀
曰浙今之好事者凡稱士大夫之家浙米飯多作折聲
呼之良可怪笑然退之城南聯句云浙玉炊香粳浙亦
作浙又何耶

刊謬正俗郊特牲云既奠然後燂蕭合羶薌此言蕭燂以脂合黍稷燒之羶者脂氣薌者黍稷氣於義自通而康成乃云羶當為馨字之誤亦為迂曲矣

刊謬正俗莊十年曹劌之鄉人謂劌曰肉食者謀之又何間焉對曰肉食者鄙未能遠謀而今流俗謂凡是食餽炙者即合志識昏蔽心慮憤濁不堪謀事故須蔬食菜羹襟神明悟為之也至乃遞相戲弄以為口實不亦謬乎

雋言匈奴傳父兄緩帶稚子咽哺師古曰咽吞也哺謂所含在口者也咽音宴哺音捕

雋言韓信傳乃晨炊蓐食張晏曰未起而牀蓐中食也又令其裨將傳餐服虔曰立駐傳餐食也如淳曰小飯曰餐破趙後乃當共飽食也○鄭當時傳不過具器食師古曰猶今言一盤食也叔孫通傳呂后與陛下攻苦食啖如淳曰食無菜茹爲啖師古曰啖當作淡淡謂無味之食也言共攻擊勤苦之事而食無味之食也

資暇錄杜詩頓頓食黃魚晉謝僕射陶太常同詣吳領
軍坐久吳留客作食至日已中使婢賣物供客比得一
頓食殆無氣可語

能改齋漫錄食可以言一頓世說羅友嘗伺人祠欲乞
食主人迎神出曰何得在此答曰聞卿祠欲乞一頓食
耳

野客叢書漫錄曰食可以言頓世說羅友曰欲乞一頓
食僕謂頓字豈惟食可用如前漢書一頓而成是言事

也唐書打汝一頓是言杖也晉書一時頓有兩玉人是
言人也宋明帝時王忱嗜酒以大飲為上頓是言飲也
豈獨食哉續釋常談引世說以證一頓二字出處不知
二字已見前漢書矣

丹鉛錄俗語飯曰一頓其語亦古有之賈充傳云不頓
駕而自留矣隋煬帝紀云每之一所輒數道置頓元微
之連昌宮詞驅令供頓不敢藏文字解詁續食曰頓
五雜組六朝時呼食為頭北戶錄晉元帝謝賜功德淨

饌一頭又謝齋功德食一頭又劉孝威謝賜果食一頭
一頭即今一筵也然古未前聞不知何義

能改齋漫錄世俗例以早晨小食為點心自唐時已有
此語按唐鄭僂為江淮留後家人備夫人晨饌夫人顧
其弟曰治妝未畢我未及餐爾且可點心其弟舉甌已
罄俄而女僕請飯庫鑰匙備夫人點心僂詎曰適已給
了何得又請云云

野客叢書漫錄謂世俗例以早晨小食為點心云云或

謂小食亦罕知出處僕謂見昭明太子傳曰京師穀貴改常饌為小食小食之名本此

老學庵筆記梅宛陵詩好用案酒俗言下酒也出陸璣

草木疏荇菱

音接亦作接

余也煮其白莖以苦酒浸之脆美

可案酒今北方多言案酒

宛委餘編陸璣草木疏若可按酒梅宛陵詩多用案酒字今俗云添案蓋出此也

黃氏筆記龔頤正續釋常談最號詳博案酒二字出儀

禮注乃遺而弗及蓋其所釋者當時南方之常談耳

名義考今謂折俎曰案酒謂腥曰下飯說文下也亦作
案陸璣云姜余浸以苦酒肥美可以案酒下飯古無是
稱今人謂腥可以下飯也又謂歸餽曰下程夫行者登
途曰上路則停驂當曰下程必有歸餽以食俗所謂下
馬飯者也

鶴山雅言進食之禮左殽右馐食居人左羹居人右方
氏云食以六穀為主地產以作陽德故居左羹以六牲

為主天產以作陰德故居右孔氏謂熟肉帶骨而饔曰
散純肉切之曰載骨是陽故在左肉是陰故在右飯燥
為陽羹濕為陰義亦通

鶴山雅言御食於君鄭氏謂勸侑曰御呂氏謂侍食也
如內則父沒母存冢子御食是也予謂御字字義謂行
止有節音如詔王馭羣臣之馭同

丹鉛錄會聚飲食曰酺酺之為言哺也以食曰舖以飲
曰酺詩曰以開百室鄭氏箋曰百室出必共泄而耕入

必共族而居也又有祭酺合醵之歡周禮族師祭酺注
酺者為人物災害之神田有蝗螟廩有馬瘟皆祭之祭
畢而合飲遂名為酺也校人冬祭馬步杜子春云步即
酺也則其音當為步也春秋緯云酒者乳也王者法酒
旗以布政施天乳以哺人後世酺祭廢而羣飲有禁漢
世有賜酺之典丘文莊謂禁民飲尚不可況導之使飲
乎此言殊未當

嬾真子國初號令猶有漢唐之遺風大中祥符元年正

月三日天書降大赦改元東都賜酺三日此蓋漢遺事也漢律三人以上無故飲酒罰金四兩故漢以賜酺為惠澤令得羣飲酒也酺音蒲注云王德布於天下而合聚飲食為酺或問賜酺起於漢乎僕對曰趙世家載武靈王行賞大赦置酒酺五日則自戰國時已如此矣

按酺

字或作脯
音義同

臆來世多用烹鮮字未若前漢陸賈傳曰數擊鮮毋久溷汝為也注云擊殺牲牢與我鮮食擊鮮二字為勝劉

汾注引史記云數見不鮮謂言人之常情頻見則不美
又引馬宮傳不鮮謂漢人語而史記本傳注云不鮮之
義乃必令鮮美作食莫令見不鮮之物也按馬宮三公
之位鼎足承君不有鮮明風守無以居位如是則又與
所援不同未知孰是尚書益稷篇暨益奏庶鮮食註云
鳥獸之食也無逸篇惠鮮鰥寡言窮民垂首喪氣文王
之惠綏莫不鮮鮮然有生意鮮字解惠亦奇

真珠船今人宴終必薦粉羹其來頗遠陳正敏遊齊閒

覽云太祖內宴先命進粉故名頭食後人宴終方薦此味蓋失其次耳

野客叢書今人茹素而親鄰設酒殽以相煖熱名曰開葷於理合曰開素此風已見六朝觀東昏侯喪潘妃之女閣豎共營殽羞云為天子解菜正其義也

說畧論云從旦至中其明轉盛名之為時中後明沒名為非時今言中食以天中日午時得食僧祇云午時日差一髮即是非時毗羅三昧經瓶沙王問佛何故日中

佛食答云早起諸天食日中三世佛食日西畜生食日暮鬼神食佛制斷六趣令同三世佛食也

刊謬正俗喪服傳記云既虞飯疏食水飲既練食菜果飯素食注云素猶故也謂平生時食也按素食謂但食菜果糗餌之屬無酒肉也禮家變節漸為降殺始喪三日不食卒哭之內朝夕各一溢米為粥而已既虞疏食水飲疏食謂麤糲之飯單率之菜也既練遍食菜果酸臠既除喪始食乾肉飲酒乃復平生時食耳此是禮經

明文安得始練便復平生故食乎又班書霍光傳載昌
邑王過失云典喪不素食王莽傳云每有水旱莽輒素
食太后詔莽曰聞公菜食憂民深矣今秋幸熟公勤於
職幸以時食肉據此益知素食是無肉之食非平生食
也今俗謂桑門齋食為素食

余氏辨林古人蔬食是乏米以蔬充食非但不得肉也
漢趙孝夫婦常蔬食而以穀陰讓弟禮禮覺亦不食穀
遂共蔬食則蔬食之非穀食無疑

癸辛雜識莊子人間世云仲尼曰齋曰回之家貧唯
不飲酒不如葷者數月矣若此則可以為齋乎曰祭祀
之齋非心齋也成玄英註曰葷辛菜也按說文葷臭菜
也錯曰通謂芸臺椿韭蒜葱阿魏之屬氣不潔也荀子
哀公篇孔子曰夫端衣玄裳而乘輅者志不在于食葷
註云葷菜葱韭之屬論語齋必變食周禮膳夫王齋曰
三舉鄭註云齋必變食也疏曰齋必變食故加牲體至
三太牢

牛羊豕共為一牢○三舉朝也日中也夕也
凡用三大牢蓋不敢餒餘以瀆其精明也

胡

明仲論梁武曰祭祀之齋居必遷坐必變服齋必變食
食謂盛饌一其心志潔其體氣以與神明交未嘗不飲
酒不如葷也晦庵釋齋必變食亦取莊子而黃氏亦兼
取之朱又謂葷是五辛又曰今致齋有酒非也然禮中
乃有飲不致醉之說何耶

留青日札禮記葷注薑及辛菜荀子志不在于食葷注
蔥薤也道家以韭蒜芸薹胡荽薤為五葷楞伽經五辛
一大蒜二茗葱三慈葱四蘭葱五興渠謂之五種辛菜

立春日五辛盤今多用芥取發新之意

余氏辨林禮玉藻云膳于君有葷注薑及辛菜也荀子

云志不在于食葷注葱薤也今釋家止以韭蒜芸薑胡

荬葱為五葷而薑薤辛菜毫不之忌

今按禮記鄭註葷
薑及辛菜辟凶邪

也孔穎達云恐邪氣干犯故用辟
凶邪之物覆之則釋氏之忌謬矣

說畧梵網經言修行者不得食五辛五辛者一葱二薤

三韭四蒜五興渠釋慧日云僧徒中多迷五辛中興渠

或云芸薑胡荬或云阿魏惟淨土集中別行盡著中五

辛此土唯有四一蒜二韭三葱四薤闕於興渠梵語稍訛正云形具餘國不見迴至于闐方得見也根麤如細蔓菁根而白其臭如蒜彼國人種取根食也於時冬天到彼不見枝葉薑蓂非五辛所食無罪

留青日札今齋食者諸葷皆禁忌反食牛乳白鯊以為佛家許食乳餅石首不知乳乃廣東乳田所種實米粉音勇汁石首即石耳乃深山窮崖所產者

白獺髓浙間以牛乳為素食佛以為食嘉定間黃子中

大諫言向在廣中見韶陽屬邑乳源民訴于漕司與民
爭乳田親引而問之何謂乳田民曰鄉中有地種乳先
掘地成窟以粳米粉鋪于窖內以草蓋之用糞壤壅之
候雨過氣出則發開而米粉已化成蛹如蠶螭狀取蛹
作汁以米粉漬而蒸成乳食之也韶陽乃六祖禪師顯
化道場而彼中皆為此不知其故恐鄉原不以牛乳為
食耳

書傳正誤燕窩海粉二物俗以為海味之素食誤也燕

窩係銀魚之初生者海燕銜以結窩故曰燕窩海粉是海魚口吐之物以其形似粉故曰海粉魚去而海粉浮土人收之其色綠若日晒過收之其色黃是二物者一本魚質一為魚吐非素物也

丹鉛錄書集謝人餽食曰昨損豐餽又曰芳飣見何曾傳

丹鉛錄夏日供帳飲食處曰冰厨見越絕書閭廬庖所也

集覽征羌諸將多盜牢稟稟筆錦反賜穀也按西域傳
須諸國稟食注稟給也讀與廩同音力稔反前書音義
曰牢稟食也古者名稟牢

集覽光啟三年廣陵城中無食以堇泥為餅通鑑釋文
曰堇草名爾雅謂之齧苦今堇葵也愚謂此說恐悞案
堇當音芹說文堇黏土也徐氏曰今人謂水中泥黏者
為堇且上文云草根木實皆盡則又安得有堇葵在此
必黏土無疑隋煬帝時江都民擣橐煮土而食唐昭宣

時朱全忠圍劉守文于滄州城中食盡丸土而食以此益信非堇葵明矣

庶物異名疏博物志徐州人以土為蓬塊劉守光圍滄州城中食盡食堇塊粘土也

示兒編前輩多引脫粟飯為公孫弘事按韓子春秋晏嬰齊相嘗食脫粟米不食重味則是倡自晏平仲

演繁露王嘉傳玉食注言精好如玉周禮王齋則供玉

食

鄭玄註云玉是陽精之純者食之以禦水氣鄭衆云王齋當食玉屑孔穎達云其玉屑研之乃可食故云

當食玉屑也

是真以玉參饌也玉不可炊如何可食當是參

粒為禮如今人服藥耳書曰惟辟作福惟辟作威惟辟
玉食三者一類也作福作威非尋常刑賞之有定別者
也天子時出意見特有賜予誅治也則玉食也者非常
饌也當齋之時特設此玉如特作之威福非常發也亦
如漢武以玉屑和露之類後世乃欲求服玉之法殆失
本意矣

繫瓦編按古注玉食乃珍異之食即作福作威亦不過

得專賞罰人耳程乃謂真以玉參饌且以作福作威為特作之威福不已鑿乎

批言古詩云白石那可煮按抱朴子有引石散以方寸匕投一斗白石子中以水合煮之立熟如芋子可食以當穀張太玄舉家及弟子數十人隱林其山中以此法食石十餘年皆肥健

藝林彙考飲食篇卷一

欽定四庫全書

藝林彙考飲食篇卷二

蓬萊縣知縣沈自南撰

羹豉類

杜詩云香聞錦帶羹荆湖近事荆渚間有花名錦帶春末開花紅白如錦初生葉柔脆可食

山家清供錦帶又名文官花條生如錦葉始生柔脆可羹杜甫故有香聞錦帶羹之句或謂蓴之縈紆如帶况

蓴與菰固生水濱昔張翰臨風必思蓴鱸以下氣按本草蓴鱸同羹可以下氣止嘔以是知張翰在當世意氣抑鬱隨事嘔逆故有此思耳非蓴魚而何杜甫卧病詩恐同此意也謂錦帶為花或未必然

山家清供芹楚葵也又名水英二種荻芹取根赤芹取葉與莖俱可食二月三月作莢時采之入湯取出以苦酒研子入鹽與茴香漬之可作菹惟淪而羹之既清而馨猶碧澗然故杜甫有香芹碧澗羹之句

山家清供杜甫詩云青青高槐葉采掇付中厨新麵來
近市汁滓宛相俱入鼎資過熟加餐愁欲無即此見其
法于夏采槐葉之高秀者湯少淪研細濾清和麵作淘
乃以醯醬熟蒸簇細苗以盤行之取其碧鮮可愛也未
云君王納涼晚此味亦時須不惟一食不忘君且知貴
為君王亦珍此山林之味旨哉詩乎

宋景文筆記擣辛物作齏南方喜之所謂金齏玉膾者
古說齏白曰受辛是白中受辛物擣之

醫譚嶺表錄異曰交趾重不乃羹不乃擺也牛羊臠擺
洗作羹貴嗅其臭今北方有驢板腸板或擺之訛

刊謬正俗王叔師注楚詞招魂云有菜曰羹無菜曰臠

音堅按禮羹之有菜者用枏其無菜者不用枏又蘋藻二

物即是鉶羹之芼安在其無菜乎羹之與臠烹者以異

齊調和不同非係于菜也今之膳者空菜不廢為臠純

肉亦得名羹取舊名耳

馬希聲食雞臠數
盤集覽引此注

說栝立春日春餅生菜為春盤杜詩春日春盤細生菜

坡詩青蒿黃韭簇春盤喜見春盤得蓼芽
蓼芽蒿笋薦春盤

高齋詩話牧之和裴傑新櫻桃詩云忍用烹騂酪從將
玩玉盤流年如可住何必九華丹唐人已用櫻桃薦酪
也茗溪漁隱曰撫言載唐新進士尤重櫻桃宴劉覃及
第大會公卿和以糖酪則櫻桃薦酪又可驗矣

疑耀余鄉嗽荔枝多以燒酒汎之即製荔枝酒者亦以
燒酒蓋自唐已然矣白樂天有詩曰荔枝新熟雞冠色

燒酒初開琥珀香欲摘一枝傾一盞西樓無客共誰當
此一証也

韻語陽秋蜀中食品南方不知其名者多矣而況其味
乎東坡所謂豆英圓且小槐芽細而豐者巢菜也所謂
贈君木魚三十尾中有鵝黃子魚子者音筍也是二

物者蜀川甚貴重東坡在黃州時去鄉已十五年思巢
菜而不可得會巢元修自蜀來使歸致其子而種之東
坡之下又作筍酢浸蜜漬可致千里外嘗以餉殊長老

則此二物之珍可知矣。蒟醬，蜀醬也。蜀都賦所謂蒟醬流味是也。苞蘆，蜀鮓也。老杜所謂香飯兼苞蘆是也。

辨物志：南越食唐蒙以牂牁。蜀枸醬既云蜀，又云牂牁何也？枸醬出于蜀而持市于夜郎，夜郎臨牂牁江，故兼曰牂牁。猶之黃連產九谿，永定兩衛而經販于澧州，本草遂載黃連澧州者為勝云。

留青日札：醬說文醢也。醢，肉醬也。古有豉醬，又菜菹亦謂之醬。禮記芥醬是也。今之醬則豆醬也，用黃豆和小麥麴。

伴勻發黃名曰醬黃又用鹽和水成鹵而下之晒熟成
醬以供烹調其汁曰醬油又蠶豆亦可造醬磨碎者曰細
醬亦曰搗醬豉史記鹽豉千合楚詞大苦鹹酸辛甘行
注曰大苦豉也豉配鹽幽菜也

留青日札史記鹽豉千合

按史記貨殖傳作
荅漢書乃作合耳

豉配鹽幽

菽

同

也菽豆也幽謂造之幽暗也今人謂遏醬藏之幽

室是也白虎通有榆莢醬武帝內傳神藥有連珠醬玉
津金醬元靈醬唐有葫蘆醬宋有紅螺醬廣人有蟻子

醬今富家有枸杞醬玫瑰醬

近峰聞畧楊誠齋簡一江西士人云配鹽幽菽欲求少
許士人不解亟往謝之請問何物誠齋檢禮部韻畧豉
字注云配鹽幽菽也按楚辭曰大苦醎酸辛甘行說者
曰大苦豉也言取豉汁調以醎酸椒薑飴蜜則辛甘之
味皆發而行然古無豉字見史游急就章史記貨殖傳
葢漢以來始有也今江西人患傷寒疾多以豆豉煮湯
飲之汗出即愈

丹鉛錄說文解豉字云配鹽幽菽也三蒼解詁

音倩

字云

詁冥果青色也蓋豉本豆也以鹽配之幽閉於甕盎中所成故曰幽菽冥果蜜煎果也以銅青浸之加蜜而冥於缶中故曰冥果幽菽冥果取名于幽冥見其與生菽生果異也解詁之妙有如此誰謂文章不在換字乎說文解碇字云以石研繒解熨字云以火申繒皆形容之妙碇即碾字

老學庵筆記北戶錄云廣人於山間掘取大蟻卵為醬

名蟻子醬按此即禮所謂蚘

真其反

醢

見內則鄭氏註云蚘蚘蟬子也

三

代以前固以為食矣然則漢人以鼃祭宗廟何足怪哉

五雜組禮有醢醬卵

讀為鯢魚子

醬芥醬豆醬用之各有所

宜故聖人不得其醬不食今江南尚有豆醬北地則但

熟麵為之而已又桓譚新論有脰醬

脰音羶生肉醬也

漢武帝

有魚腸醬南越有茆醬晉武帝與山濤書致魚醬枚乘

七發有芍藥之醬宋孝武詩有鮑醬又漢武內傳有連

珠雲醬玉津金醬神仙食經有十二香醬今閩中有蠣

醬醬醬蛤蜊醬蝦醬嶺南有蟻醬則凡聶而切之醃藏者槩謂之醬矣

雋言西南夷傳粵食蒙蜀枸醬晉灼曰枸音矩劉德曰枸樹如桑其椹長二三寸味酢取其實以為醬美蜀人以為珍味也師古曰劉說非也子形如桑椹緣木而生非樹也子又不長一二寸味猶辛不鮮

鼠璞西漢食貨志猗頓用鹽鹽起

今按此文見史記漢書貨殖傳中曰食貨

志者注鹽鹽池也於鹽造鹽故曰鹽鹽監音古予觀采

謬也

薇注王事靡盬盬不堅固也顏羽注盬不攻緻周禮盬

人共其苦鹽杜子春讀苦為盬謂出鹽直用不練

今按周禮

鄭註本作凍音練史記索隱乃作練耳

治以詩禮觀之則盬為不攻緻及

不練治以食貨志注觀之則盬乃盬池二說似異

顧有孝曰

按周禮賈公彥疏云苦當為盬盬謂出於盬池今之類盬是也又云杜子春讀苦為盬者盬鹹非苦故破苦為盬見今海旁出鹽之處謂之盬云直用不凍治者對下經驚盬是凍治者也與漢書師古註原屬同解今云二說似異者謬然海鹽練治後成其為盬難壞池盬出水也驚音煮

即成其為盬易壞其理一也

杜言五代晉天福二年于閩國獻紅鹽范景仁東齋記
江南有紅鹽橄欖樹高數丈以紅鹽塗樹子自落故詩云
紛紛青子落紅鹽廣志山丹衛北五百里有紅鹽池產
紅鹽

桐薪北戶錄載恩州有鹽場出紅鹽色如絳驗之即繇
煎時染成差可愛也鄭公虔云張掖池中出桃花鹽色
如桃花隨月盈縮今寧夏近涼州地鹽井所出亦謂之
紅鹽道家名絳鹽案鹽有五色安息國中出五色鹽赤

其一也南史載魏主遣送九種鹽五種能療病四種不
中食則赤鹽在內乃知胡中但重水晶而不重桃花無
怪其不知用矣又涼州異物志有戎鹽讚云鹽山二岳
兩色為質赤者如丹黑者如漆小大從意鏤之為物作
獸辟惡佩之為吉則左傳刻鹽形虎之說信有自歟鹽
字象器中煎鹵之形其煮鹽器漢人呼之為牢盆

緯畧李白詩客到但知留一醉盤中祇有水晶鹽金樓
子曰胡中有鹽瑩澈如水精謂之玉華鹽

珍玩考鹽說文醎也王彛詔云鹽食肴之將黃帝臣夙沙初作者煮海鹽古者不煉治之鹽曰苦鹽祭祀用之煉治者曰散鹽蓋鹽筴之利興于管子鹽鐵之制備于孔僅鹽政四一曰散鹽煮海成之二曰鹽鹽引池化之三曰形鹽掘地出之四曰飴鹽於戎取之今淮浙最盛海濱地曰鹽場籍曰竈戶民曰鹵丁煮盤或鐵或竹有沙泥燒鹽有草灰燒鹽所產甚廣河東有鹽池

蘇恭云解人取鹽於

池傍耕地沃以池水每鹽南風急則宿昔成鹽滿畦彼人謂之種鹽

川貴有鹽井沙漠有

鹽澤女直麻布鹽生木枝上亦有鹽海階州出一種石

鹽生山石中不由煎煉自然成鹽色甚明瑩彼人甚貴

之云即光明鹽也真臘山間有石味勝於鹽可琢成器

忽魯謨斯山連五色皆是鹽也鑿之鍤音賤為盤碟碗器

之類食物就用而不加鹽矣

岑樓慎氏曰兩山墨談所載非異而異蓋不博也

浙中皆白鹽張融海賦漉沙構白熬波出素是也福州

有紅鹽郭璞鹽賦爛然若鹽是也胸臆音蠢縣鹽井鹽方

寸中央隆起曰傘子鹽見酉陽雜俎又陸鹽昆吾周十

里餘無水自生末鹽月滿如積雪味甘月虧則如薄霜

味苦月盡全無

本樓慎氏曰太平廣記傑公所論南燒羊北燒羊之鹽疑即此也

白鹽

厓鹽如水晶名水晶鹽又名君王鹽今環慶鹽池所產

塊然如投子瑩然精白明潔李太白詩盤中惟有水晶

鹽是也車師鹽白者如玉赤者如朱高昌赤鹽廣東皆

黑鹽漢書天竺國黑鹽是也又有黃鹽紫鹽即戎鹽也

後漢曰別御鹽者紫色鹽也甘肅一路有青鹽池黃鹽

池紅鹽池貴州鎮遠民以炭灰為鹽時俗味苦者曰苦

鹽甜者曰飴鹽東方曰斥西方曰鹵河東曰鹽河內曰

鹹亦曰鹺今江干近海人稱沙鹵之地當曰沙斥

音赤鹽也

斥東方鹹地鹵西方鹽地史記東方食鹽斥西方食鹽

鹵故說文曰東方謂之斥西方謂之鹵又天生曰鹵人

生曰鹽釋名地不生物曰鹵故沙鹵謂之确薄之地今

亦通稱斥鹵也

又按鹽麤子曰叛奴鹽蜀人曰酸桶吳人曰烏鹽其實採熟為穗著粒如小豆

其上有鹽如雪可以調羹戎人亦用此謂之水鹽故有叛奴鹽之名見通志草木畧

演繁露唐會要祥瑞門武德七年長安古城鹽渠水生

鹽色紅白而味甘狀如方印按今鹽已成鹵水者暴烈日中數日即成方印潔白可愛初小漸大或十數印累繫相連則知廣瑞所傳非為虛也

辨物志食貨考有末鹽顆鹽之異何居曰末鹽人力之所致取海水井水用煎熬之法烹煉而成故其鹽常細碎為末顆鹽出于解池大抵如耕種法三月一日墾畦四月始種決水灌之俟南風起此鹽遂熟風一夜起水一夜結成鹽故鹽多塊實而為顆

辨物志本草經云大鹽名戎鹽主明目去病通考曰戎鹽並不中食若是則後魏太宗賜崔浩水精戎鹽一兩又何物耶考胡中有鹽瑩徹如水晶名玉華鹽以供王厨意太宗賜浩者即王厨之餘而本草謂明目去病者或胡鹽耶魏太武征彭城遣送九種鹽內胡鹽實治目病胡戎同義則戎鹽為胡鹽無疑

真珠船李白詩客到但知留一醉盤中祇有水晶鹽按梁天監中天竺王屈多獻方物云其國恒水甘美下有

真鹽色正白如水晶金樓子云胡中有鹽瑩如水晶謂之玉華鹽酉陽雜俎云白鹽崖有鹽如水晶名為君王鹽段公路北戶錄云鹽有如水精狀者一統志撒馬兒罕土產水晶鹽堅明如水晶琢為盤以水濕之可和肉食然則祇以此味按酒亦自不儉

饔諱唐以前言饔乃是糟耳故字從食或從米所謂唐人喜甜酒正不遠于饔也蔗霜宋始大著

學齋佔俾老學菴筆記其中一條云聞人茂德博學士

也言沙糖中國本無唐太宗時外國貢至問其使人此何物云以甘蔗汁煎用其法煎成與外國者等自此中國方有沙糖凡唐以前書傳及糖者皆糟耳是未之深考也按宋玉大招已有柝漿字前漢郊祀歌柝漿析朝醒注謂取甘蔗汁以為飴也又孫亮取交州所獻甘蔗飴而二禮注飴字俱云煎米蘖也一名飴則是煎蔗為糖已見于漢時甚明而說文及集韻並以糖為蔗飴曰飴曰飴皆是堅凝可含之物非糟之謂其曰糟字止訓

酒粕不以訓糖

容齋隨筆糖霜之名唐以前無所見自古食蔗者始為蔗漿宋玉招魂所謂飴飴魚羔有拓漿是也其後為蔗飴孫亮使黃門就中藏吏取交州獻甘蔗飴是也後又為石蜜南中八郡志云笮甘蔗汁曝成飴謂之石蜜本草亦云煉糖和乳為石蜜是也後又為蔗酒唐赤土國用甘蔗作酒雜以紫瓜根是也唐太宗遣使至摩揭陀國取熬糖法即詔揚州上諸蔗搾瀋如其劑色味愈於

西域遠甚然只是今之沙糖蔗之技盡於此不言作霜
然則糖霜非古也歷世詩人模竒寫異亦無一章一句
言之唯東坡公過金山寺作詩送遂寧僧圖寶云涪

音浮

江與中泠共此一味水冰盤薦琥珀何似糖霜美黃魯
直在戎州作頌答梓州雍熙長老寄糖霜云遠寄蔗霜
知有味勝於崔子水晶鹽正宗掃地從誰說我舌猶能
及鼻尖則遂寧糖霜見於文字者實始二公甘蔗所在
皆植獨福唐四明番禺廣漢遂寧有糖冰而遂寧為冠

四郡所產甚微而顆碎色淺味薄纔比遂之最下者亦
皆起於近世唐大厯中有鄒和尚者始來小溪之繖山
教民黃氏以造糖霜之法繖山在縣北二十里山前後
為蔗田者十之四糖霜戶十之三蔗有四色曰杜蔗曰
西蔗曰芳音勒蔗本草所謂荻蔗也曰紅蔗本草崑崙蔗
也紅蔗止堪生噉芳蔗可作沙糖西蔗可作霜色淺土
人不甚貴杜蔗紫嫩味極厚專用作霜凡蔗最困地力
今年為蔗田者明年改種五穀以息之霜戶器用曰蔗

削曰蕉鐮曰蕉甃曰蕉碾曰搾斗曰搾牀曰漆甕各有
制度凡霜一甕中品色亦自不同堆疊如假山者為上
團枝次之甕鑑次之小顆塊次之沙脚為下紫為上深
琥珀次之淺黃又次之淺白為下宣和初王黼創應奉
司遂寧常貢外歲別進數千斤是時所產益奇牆壁或
方寸應奉司罷乃不再見當時因之大擾敗本業者居
半久而未復遂寧王灼作糖霜譜七篇且載其說予采
取之以廣聞見

能改齋漫錄近世造糖之精者謂之獅子乳糖亦有所
本耳按後漢顯宗紀注云以糖作狻猊形號猊糖

演繁露太平御覽異物志曰交趾甘滋大者數寸煎之
凝如冰破如博棊謂之石蜜涼州異物志曰石蜜之滋
甜於浮萍非石之類假石之名實出甘柘變而凝輕注
云甘柘似竹煮而曝之則凝如石而甚輕又魏文帝詔
曰南方龍眼荔枝寧比西國蒲萄石蜜合此數說觀之
既曰柘漿所凝其狀如冰而名又為石則今之糖霜是

矣又有崖蜜者蜂之釀蜜即峻崖懸竄其窠使人不可攀取也而人之用智者伺其窠蜜成熟用長竿繫木桶度可相及則以竿刺窠窠破蜜注桶中是名崖蜜也

宛委餘編石蜜非蜜也本草云石飴也生武都此品今不見今所謂石蜜者糖精也案唐書番胡國出石蜜中國貴之上得其法今揚州煎諸蔗之汁造焉色味逾於西域○異物志云交趾之單滋大者數寸煎之凝如冰破如博碁京州異物志曰石蜜之滋甜於浮萍非石之

類假石之名實出甘柘變而逾輕註煮而暴之則凝如石而甚輕可攷見矣

名義考杜詩崖蜜亦易求注以為櫻桃南中八郡志榨甘蔗汁曝成飲謂之石蜜詩註枳枸樹高大似白楊有子著枝端如指長數寸噉之甘美如飴八月熟亦名木蜜孔氏六帖蜀中有竹蜜蜂好于野竹上結窠窠與蜜并紺色甘倍于常蜜一統志安南有波羅蜜大如冬瓜皮有軟刺五六月熟味最甜香食能飽人

說畧油通四方可食與熬者惟胡麻為上俗呼脂麻言其性有八拗謂雨暘時薄收大旱方大熟開花向下結子向上炒焦壓榨方得生油膏車則滑鑽針乃澁也而河東食大麻油氣臭與荏子皆堪作雨衣陝西又食杏仁紅藍花子蔓青子油亦以作燈祖珽以蔓青子薰目致失明今不聞為患山東亦以蒼耳子作油此當治風有盆江湖少胡麻多以桐油為燈但烟濃汙物畫象之類尤畏之沾衣不可洗以冬瓜滌之乃可去色青而味

甘誤食之令人吐利飲酒或茶皆能蕩滌蓋南方酒中多用灰爾嘗有婦人誤以膏髮粘滯百治不能解竟髡去之又有旁毗子油其根即烏藥村落人家以作膏火其烟尤臭烏柏子如脂可灌燭廣南皆用處婺州亦有潁州亦食魚油頗腥氣宣和中京西大鯪人相食煉腦為油以食販于西方莫能辨也

留青日札醋醢也本作酢禮記漿注酢醢也酪注亦酢醢也今用米或粳造如造酒法而抔成酸香味也上者

色紅名珠兒滴醋次者色黃下者色白有臘醋有桃花醋即唐人之桃花醋有六月六醋有白酒醋小民亦不多造諺云若要富賣酒醋蓋二物甚有利也

藝林彙考飲食篇卷二

欽定四庫全書

藝林彙考飲食篇卷三

蓬萊縣知縣沈自南撰

粉餽類

丹鉛錄左傳菜食不鑿字當作粦精細米也詩召旻彼
疏斯粦鄭玄曰疏粗糲米米之率糲十粦九粦八侍御
七又九章算法云粟五十為糲三十粦二十七粦二十
四御二十一皆三之一也或曰粟一石為糲米六斗春

一斗為稗九升又云為鑿則八升米之細者乃窮於御

通于繫揚桓六書統曰鑿米五升舂為四升曰穀

虎安切

為五減而四也古篆作

象四

以見意小篆作

米減而三曰晶古篆作

象三

以見意搗而繫繫而

穀穀而晶細之極也魏校六書精蘊曰精粹字皆從米

精者何也米之脫粟也色微黃赤人皆知其粗也糠去

而白穀矣未也繫矣未也舂而近心矣色微若青此生

意所函也粹者何也始而磨米殼也中而舂米去膜也

卒而珪

音展多
工也

米去翳也乃後瑩然玉粒萬粒與一粒

同雖欲去之不可得而去矣學問之極功猶是易曰純

粹精也其是之謂夫慎按說文一斛粟舂為九斗張晏

曰七斗九章算術曰六斗古者斛受十斗一石粟無九

斗之理當以九章算術為是又按緯書引孔子之言曰

七變八白米出甲謂磴

音位

之為糲米也舂之則粳米也

師

當作舂音
伐舂米也

之則粳米也舊

音普各切齊
謂舂為舊

之則穀米也

又渠擇之錫嗟

音蕩
達

之則為晶米即九章所謂侍御米

之細者窮于御言其可御于君也以字言之則泉字从
白从米即古文穀字後人加殳複且贅矣𦰩入白即古
文齒字𦰩士角切音與齧同挿簡于地也春粟以杵亦
象挿簡于地之形故說文云齒字从穀省則齒加米已
贅又加殳于傍益贅矣皇象章草止用𦰩而漢碑隸字
變作𦰩可證之古字之始因附著之

丹鉛錄儒書以精鑿喻學精鑿皆言米也穀一石得米
六斗為糲一石五斗為穀得四斗為鑿得三斗為精精

之為字从米為義从青為聲古文作品象三米之形尤
見意義佛書以醍醐之教喻於佛性從乳出酪從酪出
酥從生酥出熟酥從熟酥出醍醐也

按鑿字
宜作漿

留青曰札鄭玄云米之率糲十粃九鑿八漢書曰糲粱
之食粃穀也精米也粟一石舂米一斗四升鑿鮮明貌
左傳粱食不鑿是也即所謂粱

余氏辨林食不厭精注精鑿也左傳粱食不鑿按說文
云糲米一斛舂為九斗曰鑿一斛者一石也擇一石而

為九斗者精米也鑿當作漿及丹鉛錄云一石得米四斗為漿三斗為精則精漿又有別

丹鉛錄孟子飡粥之食又作饘說文糜也周謂之饘宋謂之餲檀弓注厚謂之饘希謂之粥也鶩見說文徐邈云今饘字又作健左傳健於是鶩於是又作餲荀子酒醴餲鶩又作餐禮記取稻米為配注配當讀為餐古文

作饘集韻又作食糧鶩

配原音夷

初學記廣雅曰粥糜饘也釋名曰糜煮米使糜爛也粥

濯于糜粥粥然也周書曰黃帝始烹穀為粥風土記曰
天正日南黃鍾踐長是日始牙動為饘粥以養幼俗尚
以赤豆為糜所以象色也天文要集曰玉井主粥厨廣
志曰遼東赤梁魏武帝以為御粥說文曰周謂之饘宋

衛謂之飭揚雄方言陳楚之內相謁食麥謂之糒

扶味反

鄴中記曰并州之俗以冬至日後百日為介子推斷火
冷食三日作乾粥中國以為寒食涼州異物志曰高昌

僻土有異於華寒服冷水暑啜羅閣

郡人呼粥

初學記按叙春秋運斗樞曰粟五變以陽化生而為苗
秀為禾三變而粢謂之粟四變入臼米出甲五變而蒸
飯可食周書曰黃帝始蒸穀為飯禮記曰膳夫掌王之

食飲

食飯也飲酒漿也

食用六穀

稌黍稷粱麥
苽菰彫胡

黍稷稻粱黃粱

稍糲

稍音醕熟獲也糲音阻脚反生獲也

呂氏春秋曰飯之美者玄山之

禾不周之粟陽山之稌南海之拒闕澤九章曰粟飯五

十糲飯七十稗飯五十粢飯四十八御飯四十二

史記考要項羽記今歲饑民貧士卒食芋菽芋菽漢書

作半菽臣瓚曰食蔬菜以菽雜半之劉孝標廣絕交論
曰莫肯費其半菽蘇軾詩曰願君五袴手招此半菽魂
山家清供青精飯者以比重穀也按本草南燭木今黑
飯草即青精也采枝葉搗汁浸米蒸飯曝乾堅而碧也
久服益顏延算仙方又有青石飯世未知石為何也按
本草用青石脂三斤青粱米一斗水浸越三日搗為丸
如李大日服三丸可不饑是知石脂也二法皆有據杜
詩曰豈無青精飯令我顏色好

丹鉛錄杜詩豈無青精飯令我顏色好青精一名南天
燭又曰墨飯草以其可染黑飯也道家謂之青精飯故
仙經云服草木之正氣與神通食青燭之精命不復隕
謂此也

藝林伐山賈逵曰梁米出於蜀漢香美逾於諸梁號曰
竹根黃梁州之名因此

山家清供凋菰葉似蘆其米黑杜甫故有波漂菰米沉
雲黑之句今胡粳是也暴乾礱洗造飯既香而滑杜甫

又云滑憶凋菰飯

察 擦音

尚書故實晉書中有飲食名寒具者亦無注解處後於
齊民要術并食經中檢得是今所謂環餅桓玄嘗盛具
法書名畫請客有食寒具不濯手而執書畫因有浣玄
不憚自是會客不設寒具

五總志干寶周禮注司徒儀日祭用饔飩晉制呼為撮
撮字疑餅又曰寒具今日饊子桓玄蓄法書名畫一日
是環字

方食寒具有客不復拭手輒多染汚坡題古畫云上有

桓玄寒具油

麪音連
鍵音樓

山家清供晉桓玄不設寒具此必用油蜜煎者要術并食經皆只曰環餅世疑餠子也巧夕餽蜜食也杜甫十月一日乃有柎妝作人情之句廣記則載寒食事總三者俱可疑乃考朱氏注楚詞柎妝蜜餌有餽餽些謂以米麪煎熬作之寒具是也以是知楚詞一句自是三品柎妝乃蜜麪之乾也十月間爐餅也蜜餌乃蜜麪少潤者乃蜜食也餽餽乃寒食寒具無可疑者閩人會端名

煎餠以糯粉和麪油煎沃以糖食之不濯手則能汙物
且可留月餘宜禁煙用也和靖先生山中寒食詩云方
塘波綠杜蘅青布穀提壺似足聽有客初嘗寒具罷據
梧痛飲散幽襟信乎此為寒食具矣

拒牧音巨汝
餽餽音張皇

升鉛錄桓玄不設寒具齊民要術并食經皆云環餅世
疑餽子也劉禹錫寒具詩纖手搓來玉數尋碧油輕蘸
嫩黃深夜來春睡濃於酒壓匾佳人纏臂金盞以寒具
為餽子也宋人小說以寒具為寒食之具糯粉和麪油

煎沃以糖食之不濯手則能汚物可留月餘宜禁煙用也則寒具又非餽子存以俟博古者

五雜俎劉禹錫寒具詩云云則為今之餽子明矣宋人因林和靖詩有寒具遂解以為寒食之具安知和靖是

日不嘗餽子耶

說畧禹錫蓋以
拾頭為寒具

丹鉛錄楚詞糗糒蜜餌有餽餽王逸注餽餽餽也以蜜和米麪熬煎作糗糒擣黍作餌又有美餽衆味甘具也朱子注云以米麪熬煎作之寒具也可山林供洪曰楚

辭此句自是三品粧妝乃蜜麪之乾者十月間爐餅也
蜜餌乃蜜麪少潤者七夕蜜食也餠餽乃寒食寒具也
丹鉛錄玉燭寶典云洛陽人家正旦造絲雞蠟燕粉荔
枝故宋人賀正啟有瑞霏餞臘粉荔迎年之句

丹鉛錄楚辭精瓊靡以為糧注靡屑也今之米餬羹○
玉餌出梁元帝雜纂今之餌塊也

丹鉛錄藝文類聚束皙餅賦有牢丸之目蓋食具名也
東坡詩以牢丸具對真一酒誠工矣然不知為何物後

見酉陽雜俎引伊尹書有籠上牢丸湯中牢丸九字詩
人貪奇趣韻而不知其誤雖東坡亦不能免也牢丸今
湯餅也

丹鉛錄周禮麴

芳弓芳勇
郎第三音

蕒

見周禮籩人
儀禮有司徹

儀禮注作逢

蕒

今按周禮注云蕒泉實也熬麥曰麴麻曰蕒疏云蕒
是麻之子實也儀禮注云麴熬麥也蕒熬泉實也疏

云案喪服傳云菹者麻之有蕒者也牡麻者泉麻也若
然泉麻無實鄭云蕒泉實者舉其類耳其實泉是雄麻
無實逢蕒之文注疏俱未之有也○按鄭康成云河間
以北煮種麥賣之名曰逢用修或引此而誤作儀禮注
耳
熬麥曰麴熬麻蕒麴今之麥芽糖蕒今之麻糖也

名義考周禮羞籩之實有糗

尺救切

餌粉糗內則注擣熬

穀以為糗餌與糗同又糗擣粉熬大豆為之又曰合蒸

曰餌粉之曰糗又曰粉稻米餅之曰糗又曰粉米蒸屑

皆餌也訓皆未辨按說文糗熬米麥也徐曰爛乾米麥

也一曰麴糗也說文餌先屑米為粉然後漉之為餅也

粉以豆為粉糗糗上之糗炊米爛乃擣之不為粉也諸

家之說莫精於說文

爛麴俱音炒
義同漉音數

留青日札今市肆標曰重羅白麴漢東哲賦曰重羅之

麩塵飛雪白又名玉塵橘中叟曰君輸我瀛洲玉塵九斛

丹鉛錄女麴小麴也繭糖窠絲糖也石蜜糖霜也自然

穀元作榮非禹餘糧也俱見齊民要術

余氏辨林鼎卦爻辭覆公餗餗不解其何物攷房審權注云餗者鼎實之糝食庖珍之蒸蔬也

野客叢書沈存中筆談曰唐士人專以小詩著名而讀書減裂如樂天題坐隅詩俱化為餓殍作夫字押杜牧

之杜秋娘詩厭飫不能飴飴乃飴非飲食也僕觀晉王
薈以私粟作粥飴饑者郝鑒甚窮鄉人共飴之飴字豈
不作飲食用然考晉音乃音嗣非貽字也僕謂牧之用
作貽字必別有所據又觀後漢許楊傳舉謠歌曰飴我
大豆享芋魁飴字無音乃知牧之用字有所祖也餓殍
之殍作夫字用按唐韻數字韻收撫俱切又平表切皆
言餓死也是則殍字有二音樂天所押蓋從唐韻之平
聲者二字皆有所據存中自不深考安可以讀書滅裂

非之揚雄箴曰野有餓殍

嬾真子唐人欲作寒食詩欲押飭字以無出處遂不用
殊不知出於六經及楚詞也周禮小師掌教簫注云簫
編小竹管如今賣飴飭所吹者招魂曰柎巨妝蜜餌有
餠餠些注云餠餠飭也但戰國時謂之餠餠至後漢時
亦謂之飭耳

野客叢書劉禹錫嘗曰凡詩用僻字須有來處宋考功
詩云馬上逢寒食春來不見飭疑此字僻因讀毛詩有

替注乃知六經中惟此錫字僕觀揚雄方言有此一字
又觀樊儵傳三歲獻甘醪膏錫知漢人嘗有此語又考
周禮小師掌教簫注亦有錫字禹錫所言是未深考因
觀唐人詩集有曰馬上逢寒食途中屬暮春可憐江浦
望不見洛橋人此宋考功途中寒食詩也有曰嶺表逢
寒食春來不見錫洛中新甲子何日是清明此沈佺期
詩也禹錫舉考功馬上逢寒食之句而綴以佺期春來
不見錫之句是又誤以二詩為一詩也

演繁露

徐盈反

飴

與之一反

一也楚辭曰秬粬蜜餌有饔

張音

饔

音皇

案飴飴饔饔皆一物也而小有異說文曰飴米蘖

煎也飴和饔也釋名曰飴餅也煮米消爛洋洋然也飴

小弱於飴形怡怡然也方言曰飴謂之張皇注云即乾

飴也飴謂之該飴謂之饔凡飴謂之飴自關而東通語

也今人名為白糖者是也以其雜米蘖為之也飴即飴

之融液而可以入之食飲中者也後漢明德馬后謂含

飴弄孫者是也唐世所食飴粥是其類也張衡七辨曰

沙飴石蜜遠國貢儲卽今沙糖也唐玄奘西域記以西
域石蜜來詢知其法用蔗汁蒸造太宗令人製之味色
皆踰其初卽中國有沙糖之始耶然唐史已載糖蟹曰
蟹之將糖躁擾彌甚宜其以白糖淹之耶

按古樂府有
酒無沙糖味

句沙糖二字
不始於唐也

野客叢書宋景文公曰夢得嘗作九日詩欲用餤字思
六經中無此字遂止故景文九日詩曰劉郎不敢題餤
字虛負詩中一世豪僕讀周禮䟽羞籩之實糗餌粉飴

鄭箋今之餐饀

今按此賈公彦疏非鄭注也

安謂六經中無此字邪

又觀揚雄方言亦有此字茗谿漁隱謂古人九日詩未有用饀字惟崔德符和呂居仁一詩有買饀沽酒之語豈古人詩未用耶

鶴林玉露劉禹錫欲用饀字以其不經見然白樂天詩云移坐就菊叢饀酒前羅列則固已用之矣劉白倡和之時不知曾談及此否

野客叢書黃縠隱居詩話曰杜牧之詩有趣韻而撰造

非事實者如珊瑚破高齊作婢舂黃糜是也李詢得珊瑚其母令衣青衣而舂無糜字僕謂既言衣青衣而舂添一字何害但糜自是粥作米梁字用恐有所未安耳舂黃糜之語牧蓋祖後漢志慊慊舂黃粱之意不知糜豈可以言梁耶

游宦紀聞雲林先生黃長睿云饅頭當用糗字見東哲餅賦興元關表諸羣食肆所貨薑豉用僵字最為有理老學菴筆記楊朴處士詩云數箇胡皺徹骨乾一壺村

酒膠

去聲

牙酸南楚新聞亦云一櫟瓊根數十皴盤中猶

自有紅鱗不知皴何物疑是餅餌之屬

墨莊漫錄東坡為翰苑元祐三年供端午貼子有云上
林珍木暗池臺蜀產吳苞萬里來不獨盤中見盧橘時
於粽裏得楊梅每疑粽裏楊梅之句玉臺新詠徐君倩
共內人夜坐守歲詩酒中喜桃子粽裏覓楊梅今人未
見以楊梅為粽徐公乃守歲詩楊梅夏熟歲暮安有此
果豈昔人以乾實為之耶東坡以角黍為午日之饌故

借言之耳

歸田錄京師食店賣酸醃者皆大書牌榜於通衢而俚俗昧於字法轉酸從食醃從旨有滑稽子謂人曰彼家所賣餛飩

音俊

不知為何物也飲食四方異宜而名號

亦隨時俗言語不同或傳者失其本湯餅唐人謂之不托今俗謂之餛飩矣晉束皙餅賦有饅頭薄持起溲牢丸之號惟饅頭至今名存而起溲牢丸皆莫曉為何物薄持荀氏又謂之薄夜亦莫知何物也

倦游雜錄今人呼煮麪為湯餅唐人呼饅頭為籠餅豈
非水瀾而食者皆可呼湯餅籠蒸而食者皆可呼籠餅
市井有粥胡餅者不曉名之所謂得非熟於爐而食者
呼為爐餅宜矣

資暇錄畢羅者蕃中畢氏羅氏好食此味今字從食非
也餛飩以其象渾沌之形不正書混沌從食可矣至如
不托言舊未有刀机之時皆掌托烹之刀机既有乃云
不托今俗字有餽飩非之且甚此類頗多推理證排可

也元和中有姦僧鑒虛以羊之大府特造一味傳之于

今時人不得其名遂以其號目之曰鑒虛今往往俗

字又加食旁

率多此類也

丹鉛錄朱文公刈麥詩霞觴幸自誇真一垂鉢何須問

畢羅集韻畢羅修食也按小說唐宰相有櫻筍厨食之

精者櫻桃餽饈今北人呼為波波南人訛為磨磨○胡氏筆

叢畢羅注云修食當作活字元人琵琶記以批揀餽饈

充饑其義可參唐世櫻桃餽饈是備此二字為食物名

非本旨也今北人所謂波波乃麪為之者南人罕能修

治文公時南北絕不通焉可據為是物也酉陽雜俎衣

冠食之精者蕭家餽饈庾家粽子韓約櫻桃餽饈不云

宰相櫻筍厨也今雖俎刻多誤韻語陽秋十九卷引之

可證

演繁露湯餅一名餠飪亦名不托李正文刊誤曰舊未就刀鉗時皆掌托烹之刀鉗既具乃云不托言不以掌托也俗傳餠飪字非予始讀此未審其言信否及見束皙餅賦知其有本也皙曰仲春之月天子食麥而朝事之籩煮麥為麴內則諸饌不說餅然則雖云食麥而未
有餅餅之作也其來久矣又曰三冬冽寒涕凍鼻中霜成口外充虛解戰則湯餅為最而其形容制造之意則

曰火盛湯涌猛氣蒸作攘衣服振掌握搦搏麪瀰離
於指端手縈迴而交錯紛紛駁駁星分電落柔如春綿
白若秋練則當晉之時其謂湯餅者皆手搏而擘置湯
中煮之未用刀几也又宗懔荆楚歲時記六月伏日作
湯餅名辟惡餅庾闡賦之曰當用輕羽拂取飛麪剛軟
適中然後水引細如委綖白如秋練則其時之謂湯餅
皆齊高帝所嗜水引麪也水引今世猶或呼之俚俗又
遂名為蝴蝶麪也水引蝴蝶皆臨鼎手托為之特精麗

不同耳不知何世改用刀儿而名不托耳若叅束宗所賦則李正文所紀信而有証也餽飪恐古無此字殆後人因不托聲稱之而食其旁與歐公餽音俊餽音叨之謔同一闕捩也

猗覺寮雜記北人食麪名餽飪揚雄方言餅謂之飪齊民要術青麪麥麪堪作飯及餅飪甚美磨盡無麩則飪之名已見于漢魏五代史李茂貞傳朕與宮人一日食粥一日食不托不托俗語當以方言為正作餽飪字

鼠璞續釋常談引資暇錄云餛飩以象渾沌不正書混
沌從食不載故事事物紀原并無此名件唐逸史載李
宗回客知人飲饌將同謁華陰令客曰與公喫五般餛
飩及見果然酉陽雜俎云今衣冠家有蕭家餛飩漉去
湯肥可以瀹茗是舊有此名本草載艾葉療一切鬼氣
炒作餛飩吞三五枚以飯壓之取混沌之義信矣俱從
食邊何耶

演繁露世言餛飩是胡中混氏沌氏為之按方言餅謂

之餽

徒昆反

或謂之餽

音張

或謂之餽

音渾

則其來久矣非出

胡人也

七修類稿饅頭蠻地以人頭祭神諸葛之征孟獲命以
麩包肉為人頭以祭謂之蠻頭今訛而為饅頭也古人
寒食採桐楊葉染飯青色以祭資陽氣也今變而為青
白團子乃此義耳

因話錄食品饅頭本是蜀饌世傳以為諸葛亮征南時
以肉麩像人頭而為之流傳作饅字不知當時音義如

何適以欺瞞同音孔明與馬謖謀征南有攻心心戰之說至伐孟獲熟視營障七縱而七擒之豈於事物間有欺瞞之舉特世俗釋之如此耳

丹鉛錄食經五色小餅作花卉禽獸珍寶形按抑盛之盒中累積名曰鬪釘今人猶云釘果盒釘春盛是也俗

書作鬪釘非也

今作
鉅釘

資暇錄石鏃餅本曰嘑餅同州人好相嘑將投公狀必懷此而去用備狴牢之糧後增以甘辛變其名質以為

貢遺矣

演繁露釋名曰餅併也搜麥使合并也蒸餅湯餅之屬
隨形而名之束皙餅賦曰起搜牢九何曾蒸餅不折作
十字不喫蕭子顯齊書曰詔太廟四時祭薦宣皇帝麪
起餅起者入教麪中俗書教為酵今鬆鬆然也本朝讀蒸為
炊以蒸字近仁宗御諱故也

名義考凡以麪為食具者皆謂之餅以火炕曰爐餅有
巨勝曰胡餅漢靈帝所嗜者即今燒餅以水瀹曰湯餅

亦曰煮餅束皙云玄冬為最者即今切麪蒸而食者曰
蒸餅又曰籠餅侯思止令縮葱加肉者即今饅頭繩而
食者曰環餅又曰寒具桓玄恐汚書畫乃不復設即今
餠子他如不托起溲牢九冷淘等皆餅類

按崔鴻前趙錄曰石季龍

諱胡改胡餅曰麻餅

五雜俎餅麪饘也方言謂之餽飩又謂之餒然餽飩即
今饅頭耳非餅也京師謂之饘饘胡餅即麻餅也石勒
諱胡故改為麻餅又有蒸餅豆餅金餅索餅籠餅之異

而唐時有紅綾餡餅惟進士登第日得賜焉故唐人有
莫嫌老缺殘牙齒曾喫紅綾餡餅來之詩今京師有酥
餅餡餅二種皆稱珍品而內用者加以玫瑰胡桃諸品
尤勝民間所市又內中所製有琥珀糖色如琥珀有倭
絲糖其細如竹絲而扭成團食之有焦麩氣然其法皆
不傳於外也

余氏辨民俗傳屈原五月五日投汨羅江國人每於此
日祭之往往為蛟龍所攫屈原顯靈於長沙歐回因以

楝葉裹米絲絲縛之投江以二物為蛟龍所憚也不知
古俗五月五日烹龜食糗蓋取陰陽尚包裹未分之象
俗以競渡為屈原而作併以角黍亦為屈原而作蓋自
續齊諧所載之謬耳

演繁露或論仁人明道不計功曰人有能輕搏黍者不
能無意於百金有能輕百金者不能無意於拱璧數以
搏黍問人人無知者呂氏春秋曰以百金與搏黍以示
兒子兒子必取搏黍也以和氏之璧與百金以示鄙人

鄙人必取百金矣論蓋取此語以為之據也特牲饋食禮曰侑食搏黍授祝以薦之尸也禰衡在黃祖坐上黍臠至衡先自飽食畢搏以戲弄祖怒其戲謾此即搏黍也或以為搏黍黃鳥也王介甫詩蕭蕭搏黍聲中日漠漠春鋤影外天說春鋤白鷺也以鷺對鶯也但不知搏黍之為黃鶯何出耳

竹坡詩話東坡在黃州時嘗赴何秀才會食油果甚酥因問主人此名為何主人對以無名東坡又問為甚酥

坐客皆曰是可以為名矣又潘長官以東坡不能飲每為設醴坡笑曰此必錯著水也他日忽思油果作小詩求之云野飲花前百事無腰間唯繫一葫蘆已傾潘子錯著水更覓君家為甚酥

留青曰扎麵小麥末也今市肆標曰重羅白麵束皙賦曰重羅之麵塵飛雪白又名玉塵橘中叟曰君輸我瀛洲玉塵九斛元尚食局有御麥麵恐即今之番麥也或以為因其磨製之巧不沾塵埃而名非也

漁隱叢話今歲時人家作餠蜜油煎花果之類蓋亦舊
矣粧妝蜜餌有餠餠些餠餠餠也言以蜜和米麪煎作
粧妝中書趙舍人云方言餌餠今餠餠是也

藝林彙考飲食篇卷三

欽定四庫全書

藝林彙考飲食篇卷四

蓬萊縣知縣沈自南撰

魚膾類

說畧蘧有四朝事饋食加蘧羞蘧豆亦有四朝事饋食

加豆羞豆

今按周禮四蘧之實蘧人掌之四豆之實醢人掌之

蘧實之目十有八

而臬重出豆實之目二十有四而醢醢魚醢重出朝事

蘧實醢蕢白黑形鹽膾鮑魚鱠熬麥曰醢麻曰蕢熬稻

米曰白熬黍米曰黑蓋以麥麴麻子稻黍末作餅餠注
謂清朝未食先進寒具口實也形鹽左傳所謂鹽虎形
臠音呼說文云無骨脂注謂臠章涉直輒二反薄切肉
也生魚為大臠疏為魚腹腴鮑部巧切韻書云體魚也
注謂福今按今注
文作福室中糗乾之按疏云福室者
謂福上為室字從
魚蓋魚之糗而乾者也鮑音搜魚之析而乾者也臠以
腥薦鮑鮑以乾薦福字按說文火焙肉恐是鮑者火焙
而乾鮑者日曝而乾故均之為乾魚而異名也臠為魚

腹腴則鰾鮑魚鱠皆魚也朝食為米食寒具魚乾之屬

可夙具者也

今按賈疏云王者備物近者腥之鰾是也遠者乾之鮑及鱠是也近宜濕遠宜乾非

謂可夙具也

饋食籩實

饋食薦熟也

棗梹桃乾榛

音老一音力到反

榛實

注謂榛為梅謂榛似栗而小饋食始備米實也加籩菱

芡音險臯脯脩

經文無脩字

注菱芡也芡雞頭也

賈疏云俗有二名今人或

謂之鴈頭也

或云四角三角為芡

其寄反

兩角為芡鄭司農以

栗在加籩饋食重出作菱芡脯脩薄析曰脯施薑桂曰脩

按內饗賈疏云脩謂加薑桂鍛治之若不加薑桂不鍛治者直謂之脯

言修治脯也羞籩

糗餌粉飡注謂熬大豆與米曰糗說文熬米麥通釋燭乾米麥要之米麥豆皆可為餌者也粉注謂豆屑也米麥豆皆可為粉但粉以豆為明滑故專以豆言之餌與飡名實相近合蒸曰餌餅之曰飡疏云糗與粉為一物糗者搗粉熬大豆餌言糗飡言粉互相足也鄭康成云二物皆粉稻米黍米合以為餌餌不餅而飡作餅今之飡糕名出於此凡今俗下餅餌飡糕其制多出於古人其名已載於經典觀於籩實可見也朝事豆實韭菹醯

一本
作鹽

醢昌本麋鷄菁菹鹿鷄茆菹

京倫反

鷄菹莊魚切

說文酢菜也今俗設菜拌中漬菜皆菹之遺法

按鄭注云切之

四寸為菹賈疏云菹四寸無正文蓋以一握為限一握則四寸也

醢吐感切一音昌審

反注謂肉汁說文謂血醢醢者說文肉醬鷄音泥亦醢

之異名注謂有骨曰鷄無骨曰醢凡作醢及鷄者必先

膊乾其肉乃後莖之雜以梁麴及鹽漬以美酒置瓶中

百日即成今俗用醢

同鮮

醬皆鷄醢之遺法昌本昌蒲根

也菁菹蔓菁菜也茆

北人音抑

菹鄭司農讀為茅杜子春讀

為卯曰鳧葵也

今按鳧葵係鄭康成注文今繫杜子春下非是

康成疑茆不堪

菹從杜說按魯頌薄采其茆釋文曰即萁菜也麋鹿麋

三藟皆莖骨和肉為百日醬皆在朝事之豆亦取晨朝

易於夙辨饋食豆實唯葵菹在七菹之列餘皆藟醯葵

菹羸

力禾反

醯脾析麋

蒲佳薄難二反

醯蜃蚶

音池

醯豚拍魚醯葵

為百菜之長故饋食豆實首葵而他菹莫配焉脾析蜃

豚拍皆五齏中件目脾析牛百葉也俗呼牛胃為百葉

已見周禮注矣蜃說文大蛤

按月令雉入大水化為蜃入大水化為蛤蛤小蛤

蜃大蛤也豚拍之拍先鄭讀為膊言脅也三者近於鬻醢而

曰齏齏者以百葉諸物細切之和以醢醬不待瓶中百
日而成故別為齏之名齏從韭宜用菜若昌本深蒲作

齏固宜百葉蜃豚之肉亦可縷以為齏也羸注謂蜺

音移

蜺

由榆二音

按方言燕趙間以為蜘蛛韻書以為蝸牛蜘蛛

蝸牛非可食者疏釋引爾雅為證彼爾雅乃訓詁之儒
集經注以為書或疑內則有蝸醢恐是蜺蜺蝸牛之謂
然內則之蝸乃力戈切集韻古螺字作蝸韻釋云蚌屬

也非蝸牛之蝸矣陸佃直謂蝸牛可醢蓋為禮注所誤

爾羸螺字亦作蝸韻書以為香螺也羸注謂小

鄭注無小字

蛤韻書以為蚌狹而長者蚶漢儒相傳為蚶蜉白子亦

恐不然蚶蜉未必可食一也取白子傷生二也按天官

有鼈人掌取互物祭祀供羸羸蚶以授醢人則蚶與羸

羸皆當是螺蛤同類既掌以鼈人之官可知為水族之

產若以國語為證則國語亦但言舍蚶不取未嘗指蚶

蜉之子可取而食也唯夏小正於二月言昆小蟲抵蚶

其傳曰蚘蝱卵為祭醢夏小正本文無幾其解說處多是漢儒附會未可盡信按月令方春和時毋殺孩蟲胎夭飛鳥毋麝毋卵豈有二月正春殛蝱穴以為豆實之奉哉巷伯成是貝錦注以貝為餘蚘貝之黃質白文者或可為醢人互物之證蚘或從身醫書云食之益壽明目豈必蝱卵而後謂之蚘哉醢人春獻蜃以為醢故小正以二月抵蚘此雖流傳已久而必當改正者小正以蜃為蒲蘆朱子以為其書不足信愚於蚘為蝱卵亦不敢

以為信唯魚醢用魚可免注者妄言矣加豆之實芹

音勤

徐音謹說
文作近

菹兔醢深蒲

鄭師仲云蒲莢入
水深故曰深蒲

醢醢落

按經
文作

落爾雅
作葱同

菹雁醢筍菹魚醢芹楚葵水菜類蒿深蒲或云

桑耳或云蒲始生水中韓奕詩云其藪維何維筍及蒲

知蒲可為藪不必曰桑耳也落有苔迨二音

北人音禿
改反又丈

之鄭注云水中魚衣即苔也今海鄉之人乾苔以為菹

或疑落字從竹為落箭萌筍竹萌不思箭萌亦筍爾既

有筍菹安用箭萌籀文竹草相似其為苔菹何惑焉

今按

水中魚衣者鄭師仲之說也蕭萌者鄭康成之說也賈疏云蕭萌一名篠者也竹萌一名蕩者也萌皆謂新生者也見今皆為蕓則欲易免醢用兔雁醢用雁魚醢用經文落字為落字非是

魚如上文羞豆之實醢食糝食醢音移鄭司農云以酒醢為餅疏云若今起膠餅康成曰饗賈氏曰粥禮記有稻醢黍醢周禮亟稱於醢酒正之五飲漿人之六飲皆用醢也糝食鄭司農云菜醢蒸康成曰取牛羊豕之肉三如一小切之米二肉一合煎為餌鼎卦公醢之注云糝謂之醢震為竹竹萌曰筍筍者醢之為菜也則糝食

未嘗不用筍菹之筍也糝食醢食在七菹之外豈惟竹
萌唯所用之豆實有五齊七醢七菹三醢二食五齊之
齊注作齏昌本深蒲脾析蜃豚拍七醢醢魚兔雁麇羴
蜆七菹韭菁茱萸芹苔筍三醢麋鹿麋今孔子廟丁祀
菹醢多不如法不考周禮故爾廣中蟻子白而大淹之
實可為醬與魚子醬正同此亦是蝦子醬桂蠹之屬也
耳目所不及遂疑古人之言可笑也

丹鉛錄周禮腊人掌乾肉脯腊臠胖

鄭師仲音判
杜子春音版

之事

脯之為言晡也晡時而成也腊之為言夕也經夕而成也周易噬嗑有乾肉之文古注云乾曝而夕乾又曰晞于陽而煬于日曰乾非如今人之臘肉經臘而成也論語祭肉不過三日又服食家陳臭醃藏皆禁不食則古人脯腊之制亦養生之法也○脯薄切今之羝也腊之為言夕也朝暴而夕乾膾無骨肉也音呼詩周原膾膾謂土膏如無骨肥肉也又曰則無膾仕言其脂膏自潤也胖之為言片也析肉意也○古無臘肉臘乃祭名○

古人祭以肺為重食牲以肩為重

藝林伐山腊人掌乾肉脯腊臠胖之事鄭注乾肉若今

凉州烏翅胖肉大臠也

疏云烏翅解肉乾之狀

初學記劉熙釋名曰脯搏也乾燥相搏著也又曰脩脩

縮也乾燥而縮也說文曰脯乾肉也脩膊也搏

補莫反薄

脯搏之屋上也腕骨脯也胸脯臠也周禮曰腊人掌

乾肉凡田獸之脯腊臠胖

判之事

夫物解肆乾之謂之乾肉薄切曰脯捶之

而施薑桂曰脩脩腊小物而乾者臠胖皆為夾脊肉也

穀梁曰束脩之肉不行境

中有至尊者不貳注曰束脩脯也

天中記釋名脯搏也乾燥相搏著也脩束也乾燥縮也
○炙炙也炙于火上也脯炙以飭蜜豉汁淹之脯脯然
也釜炙於釜汁中和熟之也脰脰也脰炙細蜜肉和以
薑椒鹽豉已乃以肉銜裹其表而炙之也貊炙全體炙
之各自以刀割出於胡貊之為也○鮓鮓也以鹽米釀
之如菹熟而食之也

雉言谷永傳濁氏以胃脯而連騎晉灼曰今太官常以

十月作沸湯燂似兼羊胃以末椒薑分滿頓之暴使燥是也○楊惲傳烹羊魚羔師古曰魚毛炙肉也即今所謂燂也燂一高反

天中記少儀牛與羊魚之腥臠而切之為膾內則膾春用葱秋用芥豚春用韭秋用藟肉腥細者為膾大為軒音憲說文膾細切肉也釋名膾會也細切肉散分其赤白異切之乃會和之也

五雜組膾不厭細孔子已尚之矣膾即今魚肉生也臠

而切之沃以薑椒諸劑閩廣人最善為之昔人所云金
齏玉膾縷細花鋪不足奇也據史冊所載昔人嗜膾者
最多如吳昭德南孝廉皆以喜斫膾名余媚孌造五色
膾妙絕一時唐儉趙元楷至於衣冠親為太子斫膾今
自閩廣之外斫者噉者無人矣說文膾細切肉也今人
以殺人者為劊子手劊亦斷切之義與膾同也按膾亦
謂之蒯齊東野語時謠曰趙鬼食鴨蒯注細剉肉雜以
薑桂是也

筆乘禮記內則肉腥細者為膾大者為軒稽攷軒字乃
幹之訛按儀禮特牲饋食佐食舉幹注牲肉長脇也可
以為證

天中記爾雅曰肉謂之羹說文曰羹五味和粥也秦子
曰五味者各稱一族之名和合一鼎名曰羹猶威重廉
平恩合而為信也○說文臠肉羹釋名臠者蒿也香氣
蒿蒿也

初學記劉熙釋名曰羹汪也汁汪郎也說文曰羹五味

之和也燒豕肉羹也廣雅曰羹謂之湑音淮淮南子曰豆

之上先大羹

大羹肉湑

禮記曰蝸醢而苾食雉羹麥食脯羹

雞羹折稌犬羹兔羹和糝不蓼

稌稻也

凡羹齊宜五味之和米屑之糝麥則不

矣繆襲祭儀曰夏祠和羹苕以葵秋祠和羹苕以葱冬

祠和羹苕以韭

初學記許慎說文曰肴雜肉也醢漬肉也臠宗廟熟肉

也穀梁曰脰者俎實祭肉也生曰脰熟曰臠蓋社肉也

爾雅曰肉曰脰之

今按此句又見禮記內則疏云皇氏云治肉除其筋膜取好處故李巡注

爾雅釋器云肉去其骨
曰脫郭云剥其皮也

揚雄方言曰朝鮮冽水間凡暴

肉及牛羊五臟謂之膊家語曰夫食肉者勇悍禮記曰

濡肉齒決乾肉不齒決又曰熬捶之去其皽

音展編萑音九

布牛肉焉

陳澧注云生擣而去其皽
膜然後布于編萑之上

屑桂與薑以洒諸

上而鹽

音艷又
如字

之乾而食之欲濡肉則釋而煎之以醢

欲乾肉則捶而食之魚豢典略曰凡宗廟三歲大祫每

太牢分之左辨上帝右辨上帝后俎餘肉積於前數千名

惟俎

侯鯖錄文選古樂府名都篇寒鼈炙熊蹯又曹子建七
啟云寒芳蓮之巢龜鱸西海之飛鱗注謂今之臙寒也
引鹽鐵論云煎魚切肝羊淹雞寒又資暇錄云今之涪
肉謂之寒又廣韻云煮魚煎食曰臙

五雜組文選有寒鴈寒鼈崔駰傳亦有寒雞七啟寒芳
苓之巢龜李善注寒今臙肉也廣韻煮肉熟食曰臙然
寒字甚佳而煮熟之義極甚膚淺周禮膳羞之政凡割
烹煎和之事辨體名肉物及百品味各有所宜似非若

後世庖人一味煮熟之已也

寒與韓同按釋名曰韓羊韓雞本出韓國所為

資暇錄今縷生肝肚為飯食之一味曰生肝鏤剗言其

細切如雕鏤之義一說名生肝胡昨言似胡人祭之餘

昨聲謠故云鏤剗也今之五味

關

燻瓜茄及豬肉俗謂

之丑甲音者而臆臄臄字反是字書內煠字音丑獵者

謠呼丑甲反爾此字火旁云下木別有火旁世世下木

音士甲反是沸湯漂菜字其音丑獵者義出暗燻也

演繁露脾折牛百葉也百葉既為牛脾而片片析故

云脾析也

六研齋筆記漢時八珍狸唇豹胎之外有酥酪蟬者注云以羊脂為之乃今之抱螺酥也其形與螺初不肖而酷似蟬腹乃知名物之妙今不逮古多矣

留青日札八珍淳熬也

鄭注淳沃也熬亦煎也

淳母

鄭注云母讀曰模模象也

作此象淳熬

也炮也擣珍也漬也熬也糝也肝腎也又迤北

八珍醍醐也麇沆也野駝蹄也鹿唇也駝乳麋也天鵝

炙也紫玉漿也元玉漿也

輟耕錄元玉漿即馬奶子

呂希哲雜記八珍者淳熬也淳母也炮豚搏珍也清也熬也糝也肝膾也炮牂也先儒不數糝而分炮豚炮牂為二皆非也後世八珍則曰龍肝鳳髓兔胎鯉尾鵝炙猩唇熊掌酥酪蟬以羊脂為之

批言世傳八珍謂為熊蹯豹胎駝峰翠釜之類此不經之說也

批言初學記周太子發嗜鮑魚太公望曰鮑魚不登于俎豈可以非禮之物進太子食哉北齊史邢峙授太子

經食進邪蒿峙曰菜有不正之名非殿下宜食祖此意

也然鮑魚之事亦有可疑周禮獻音漁同又人辨魚物為

鱻鮮同薨音考以供王膳羞薨乾魚也全者為鮑魚析者為

鱮皆乾魚也內饗掌共羞脩刑臠胖骨鱮以待共膳則

鱮是王后太子所食也籩人朝事之籩其實醴蕡白黑形

鹽臠鮑魚鱮鄭司農云朝事謂清朝未食先進寒具口

食之籩鄭玄云朝事謂祭宗廟血牲之事若從先鄭則

鮑魚正王后及世子所食若從後鄭則豈有可以薦宗

廟而不可以進王后及世子者哉家語孔子曰與不善人居如入鮑魚之肆久而不聞其臭史記秦始皇崩以鮑魚亂其臭此言鮑魚之敗者耳釋名云鮑魚鮑腐也乃直以鮑魚為臭腐然作鮑魚之法於糗室中糗乾之正欲使不臭耳若必以鮑魚為臭則周公必不加籩武王必不嗜食初學記所云恐不實也

雋言兩粵傳桂蠹一鼯應劭曰桂樹中蝎蟲也蘇林曰漢舊常以獻陵廟載以赤轂小車師古曰此蟲食桂故

味辛而漬之以蜜食之也

癸辛雜識余讀杜詩偏勸腹腴愧年少喜其知味東坡詩亦云更洗河豚烹腹腴黃詩亦云故園溪友膾腹腴又云飛雪堆盤膾腹腴按禮記少儀云羞濡魚者進尾冬右腴注云腴腹下也周禮疏燕人膾魚方寸切其腴以啗所貴引以證膾膾亦腹腴前漢九州膏腴師古注云腹下肥曰腴涪翁雜說腴腹下肥處也

暖姝由筆松漠記聞云殺雞炙股烹蒲音蒲膊肉也今

亦云然蓋胸下之白肉也

輟耕錄江鄰幾雜志云丁正臣齋玉腴來館中沈休文云福州人謂之佩羹即今魚脰是也

容齋續筆鹹杭玉篇唐韻釋杭字云木名出豫章煎汁藏果及卵不壞異物志云杭子音元鹽鴨子也以其用杭木皮汁和鹽漬之今吾鄉處處有此乃如蒼耳盆母莖幹不純是木小人爭鬪者取其葉擦皮膚輒作赤腫如被傷以誣賴其敵至藏鴨卵則又以染其外使若

赭色云

輟耕錄今人以米湯和入鹽草灰以團鴨卵謂曰鹹杭
子按齊民要術用杭木皮淹漬故名之若作圓字寫則
誤矣

竹坡詩話東坡性喜嗜豬在黃岡時嘗戲作食猪肉詩
云黃州好猪肉價錢如糞土富者不肯喫貧者不解煮
慢著火少著水火候足時他自美每日起來打一椀飽
得自家君莫管此是東坡以文滑稽耳後讀雲仙散錄

戴黃昇日食鹿肉二斤自晨煮至日影下西門則曰火候足矣乃知此老雖煮肉亦有故事他可知矣

庶物異名疏盧湛祭法曰四時皆用肺膾損說文膾切

熟肉于血中和也釋名肺膾膾也全米糝之如膏鑕也

庶物異名疏酉陽雜俎食品有述蕩之擊擊腕謙擊掌欠三聲

後節中也述蕩獸名見獸部

庶物異名疏七發曰肥狗之和冒以山膚山膚即七啟玄熊素膚之膚產于山故曰山膚

庶物異名疏草木子云北人殺小羊自脊上開一孔遂旋取去內頭骨肉外皮皆完揉軟用以盛乳酪酒湏謂之渾脫按宗晉卿舞渾脫公孫大娘渾脫舞長孫無忌以烏羊毛為渾脫氍帽皆喻其柔軟若無骨而脫亦謂消肉臞也

留青曰札今酒席中之羊背皮所謂薦體在元謂之挈設上賓用之或用馬背皮餘賓用前手後手鶩則敬胸今俗敬首在北人則否也若貴戚之家有名曰割牲者

以數十金駿馬奚人當堂呈過一庖丁持利刀飛取其
臂肉一臠而獻之以誇豪奢也

天中記李德裕述夢詩曰荷淨蓬池鱸冰寒郢水醪注
每學士初上賜食悉是蓬萊池魚鱸夏至復賜及頒燒
香酒以酒味稍濃每和水而飲蓋禁中郢水酒坊也

此文

饒詩也事文類
聚作李白誤


吳興掌故吳興往時善斫鱸縷切如絲簇成人物花草
雜以薑桂故東坡云運肘如飛看斫鱸隨刀雪落驚飛

縷山谷云爛蒸同州羔灌以杏酪食之以匕不以筯南
都撥心麪作槐芽溫淘摻以裹邑抹猪炊共城香稻薦
以蒸子鵞吳興庖人斫松江鱸膾繼以廬山康王谷水
烹曾坑鬪品少焉解衣仰卧使人誦東坡赤壁前後賦
亦足以一笑也觀此則吳興斫鱸名遠矣而今皆不一
見

吳興掌故秋深時湖上人作裹鮓小魚加香料米粉荷
葉包裹熟過可食名荷葉鮓唐人李頎漁父詞綠水飯

香稻青荷包紫鱗正謂此也

說楷小截山嶺為玉杵羹黃雀脂膏為金綿鮓吳淑詩
曉羹沉玉杵寒酢疊金綿



藝林彙考飲食篇卷四